



Broj: 07-05-15-27269/23
Sarajevo, 12.06.2023. godine

Na osnovu Zakona o poticaju razvoja male privrede ("Službene novine Kantona Sarajevo", broj 29/15), Zakona o izvršenju Budžeta Kantona Sarajevo za 2023. godinu ("Službene novine Kantona Sarajevo", broj 15/23) i člana 3. stav (3) Pravilnika o postupcima u provođenju Programa razvoja male privrede ("Službene novine Kantona Sarajevo", broj 20/21), a u skladu sa Odlukom Vlade Kantona Sarajevo, broj: 02-04-24803-18/23 od 01.06.2023. godine o usvajanju Godišnjeg plana provođenja Programa razvoja male privrede za 2023. godinu i Odlukom o usvajanju Programa utroška sredstava "Poticaj razvoju male privrede" za 2023. godinu, broj: 07-05-15-26785/23 od 09.06.2023. godine, Ministarstvo privrede Kantona Sarajevo objavljuje

JAVNI POZIV

za izbor banke/banaka - partnera za plasman kreditne linije uz subvencioniranje troškova kamate za kredite odobrene subjektima male privrede sa sjedištem u Kantonu Sarajevo

Ministarstvo privrede Kantona Sarajevo poziva poslovne (komercijalne) banke da dostave ponude za obezbjeđenje kreditne linije subjektima male privrede koji imaju sjedište u Kantonu Sarajevo, sa ciljem plasmana kreditnih sredstava uz subvenciju kamatne stope. Sredstva za subvenciju kamatne stope, u skladu sa Odlukom o usvajanju Programa utroška sredstava "Poticaj razvoju male privrede" za 2023. godinu, broj: 07-05-15-26785/23 od 09.06.2023. godine (u daljnjem tekstu: Odluka) po Programu "Obezbjedenje kreditiranja pod povoljnijim uslovima", obezbijedena su u Budžetu Kantona Sarajevo za 2023. godinu ("Službene novine Kantona Sarajevo", broj 15/23), na poziciji Ministarstva privrede Kantona Sarajevo. Za ocjenu ponuda primjenivat će se sljedeći kriteriji:

- iznos plasiranih kreditnih sredstava;
- visina kamatne stope (iskazana u %);
- visina troškova obrade kredita (iskazana u %); i
- grace period (iskazan u mjesecima)

I PREDMET POZIVA

Predmet Javnog poziva je dostavljanje ponuda komercijalnih banaka u cilju izbora banke/banaka za plasman kreditnih sredstava uz subvenciju kamatne stope. Broj izabranih banaka za plasman kreditnih sredstava po ovom programu ne može biti veći od dva. Za provođenje ovog programa, odnosno za subvenciju troškova po osnovu kamatne stope u visini do 3 % planiran je ukupan iznos od 2.500.000.00 KM, a koja sredstva su obezbijedena u Budžetu Kantona Sarajevo za 2023. godinu.



II USLOVI I KRITERIJI ZA IZBOR BANKE/BANAKA

- a) Po ovom programu uslovi i kriteriji za izbor komercijalne banke/banaka za plasman kreditnih sredstava uz subvenciju kamatne stope su sljedeći:
- 1) Odnos kreditnih sredstava koja obezbjeđuje banka i sredstava za subvenciju iz Budžeta Kantona Sarajevo za 2023. godinu iskazana u formatu: iznos kreditnih sredstava/ 1 milion sredstava za subvenciju;
 - 2) Visina kamatne stope (iskazana u %);
 - 3) Grace period na dugoročne kredite (iskazan u mjesecima) ne može biti manji od šest mjeseci.; i
 - 4) Visina troškova obrade kredita (treba biti iskazana u %).
- b) Banka/banke (ponuđači) su dužni u ponudi dostaviti sve podatke u skladu sa sva četiri uslova i kriterija za izbor banke koji su navedeni u tački a). U slučaju da banka/ponuđač propusti dostaviti ponudu po osnovu svih traženih uslova i kriterija, dostavljena ponuda će biti odbačena.
- c) Cijena ponude piše se brojevima i slovima. U slučaju neslaganja iznosa upisanih broječno i slovima, prednost se daje iznosu upisanom slovima.
- d) Posebno se ističe da je kvalifikacioni uslov za daljnje razmatranje dostavljene ponude banke obaveza banke da u dostavljenoj ponudi obavezno i decidno navede odnos kreditnih sredstava koja obezbjeđuje banka i sredstava za subvenciju iz Budžeta Kantona Sarajevo za 2023. godinu iskazana u formatu: iznos kreditnih sredstava/ 1 milion sredstava za subvenciju.
- e) Visina kreditnih sredstva odnosno banke za kreditnu liniju subjektima male privrede utvrđuje se na osnovu dostavljene ponude iz tačke d) ovog poglavlja i utvrđene rang liste odabranih banaka.
- f) U skladu sa Programom utroška sredstava za 2023. godinu, planirana struktura poticajnih sredstava za subvenciju kamata u iznosu od 2.500.000,00 KM raspoređuje se izabranim bankama na sljedeći način: prvorangirana banka ostvaruje pravo na 60% ovih sredstava, a drugorangirana banka 40% ovih sredstava.
- g) Broj izabranih banaka za plasman kreditnih sredstava po ovom programu ne može biti veći od dva.
- h) U slučaju da dvije ili više banaka, nakon ocjenjivanja ponuda ostvare isti broj bodova, prednost u postupku izbora banke imat će ponuda banke čija je veća visina kapitala na dan 31.12.2022. godine.

III OBAVEZE IZABRANE BANKE

- a) Obaveza Banke je da nakon zaključivanja ugovora sa Ministarstvom privrede Kantona Sarajevo i uz saglasnost Ministarstva privrede Kantona Sarajevo objavi javni poziv za dodjelu poticajnih kreditnih sredstava, s tim da se prijave sa potrebnom dokumentacijom podnose Banci. Banka u skladu sa odnosnim propisima i pravilima struke obezbjeđuje sredstva za kreditnu liniju subjektima male privrede u pojedinačnom iznosu do 2.000.000,00 KM, na rok do sedam godina (84 mjeseca) koji ne uključuje grace period. Javni poziv za subjekte male privrede je otvoren do iskorištenja sredstava namijenjenih za subvenciju odnosno najkasnije do 31.12.2023. godine, uz mogućnost produženja roka u slučaju da se prethodno ne utroše predviđena sredstva za subvencije, a što će ugovorne strane precizirati u ugovoru.
- b) Pravo na dodjelu poticajnih kreditnih sredstava uz subvencioniranje kamatne stope i ugovoreni grace period na dugoročne kredite ostvaruju subjekti male privrede definirani Zakonom ("Službene novine Kantona Sarajevo", broj: 29/15), kao krajnji korisnici kreditnih sredstava, a koji na osnovu Obavještenja o razvrstavanju pravnog lica prema Klasifikaciji djelatnosti KD BiH 2010 ("Službeni glasnik BiH", broj 47/10), koje izdaje Federalni zavod za statistiku – Služba za statistiku za



Područje Kantona Sarajevo, obavljaju registrovanu osnovnu djelatnost unutar sljedećih područja djelatnosti, i to:

- **Područje C** - Prerađivačka industrija, šifre djelatnosti: (10.11-10.92), 11.07, (13.10-18.20), (20.11-25.30) i (25.50-33.20);
- **Područje E** - Opskrba vodom; uklanjanje otpadnih voda, gospodarenje otpadom te sanacije okoliša, šifre djelatnosti: 38.11, 38.12, 38.21, 38.22, 38.31 i 38.32;
- **Područje F** - Građevinarstvo, šifre djelatnosti: (41.10-43.99);
- **Područje G** - Trgovina na veliko i na malo; Popravak motornih vozila i motocikala, šifra djelatnosti: 45.20;
- **Područje H** - Prevoz i skladištenje, šifre djelatnosti: 52.10, 52.21, 52.23, 52.24, 52.29, 49.31, 49.39, 49.41 i 49.42;
- **Područje I** - Djelatnosti pružanja smještaja te pripreme i usluživanja hrane, šifre djelatnosti: (55.10-56.29);
- **Područje J** - Informacije i komunikacije, šifre djelatnosti: (58.11-63.99);
- **Područje M** - Stručne, znanstvene i tehničke djelatnosti, šifre djelatnosti: (69.10-75.00)
- **Područje N** - Administrativne i pomoćne uslužne djelatnosti, šifre djelatnosti: (79.11 -79.90), (81.21-81.29), 82.11 i 82.20;
- **Područje P** - Obrazovanje, šifre djelatnosti: 85.10 i (85.51-85.60);
- **Područje Q** - Djelatnosti zdravstvene zaštite i socijalne skrbi, šifre djelatnosti: (86.21-88.99); i
- **Područje S** - Ostale uslužne djelatnosti, šifre djelatnosti: (95.11-96.04).

c) Prijem zahtjeva, proces obrade i odobravanje kreditiranja iz sredstava kreditne linije vršit će odabrana banka/banke u roku ne dužem od 30 dana od dana podnesenog zahtjeva.

d) Subjekti male privrede kojima se odobre kreditna sredstva iz ove kreditne linije obavezuju se da ista koriste na način da najmanje 30% odobrenog iznosa utroše za osnovna sredstva, a maksimalno do 70% odobrenog kreditnog iznosa za obrtna sredstva i održavanje tekuće likvidnosti. Korisnik poticajnih kreditnih sredstava obavezan je zadržati minimalno 80% od broja uposlenih koji je imao na dan podnošenja prijave.

e) Nakon zaključenog ugovora između Ministarstva privrede Kantona Sarajevo i odabrane banke (u daljnjem tekstu: Banka), subjekt male privrede - podnosilac zahtjeva za kredit uz subvenciju kamate može ostvariti pravo na ovaj kredit samo kod jedne Banke. Prilikom podnošenja zahtjeva, podnosilac je obavezan dostaviti izjavu da je taj zahtjev jedini zahtjev koji je podnio u kreditnoj liniji po ovom Programu, odnosno da zahtjev za kredit u ovoj kreditnoj liniji nije predao bilo kojoj drugoj odabranoj Banci.

f) Banka nakon izvršene obrade kreditnog zahtjeva dostavlja Ministarstvu privrede Kantona Sarajevo pisani zahtjev za saglasnost na odobrenje kreditiranja, te uz pisanu saglasnost Ministarstva privrede Kantona Sarajevo, zaključuje ugovor sa korisnikom najkasnije u roku od 30 dana od dana podnesenog zahtjeva. Banka garantuje za računovodstvenu evidenciju odobrenih kreditiranja, za tačnost podataka i informacija prema Ministarstvu privrede Kantona Sarajevo.

g) Banci pripada kamata po odobrenim kreditima, troškovi obrade kredita, provizija za prijevremeni povrat kredita, kao i ostali troškovi koje snosi korisnik kredita. Banka u cjelosti snosi rizik naplate odobrenih poticajnih kreditnih sredstava - glavnice i pripadajuće kamate.

h) Smanjenje odnosa ugovorenih i odobrenih kreditnih sredstava subjektima male privrede (krajnjim korisnicima sredstava) iz kreditne linije i ugovorenih sredstava za subvenciju, nastao kao posljedica smanjenja iznosa kreditnih sredstava, koji je ugovoren sa odnosnom bankom za plasman kreditnih sredstava može odobriti Vlada Kantona Sarajevo ako za odnosno smanjenje postoji opravdan razlog Banke. U slučaju da Vlada Kantona Sarajevo ne odobri ovo smanjenje, odnosna banka nema pravo aplicirati na naredne javne pozive za izbor banke/banaka za plasman poticajnih



kreditnih sredstava u periodu do tri godine počev od dana zaključenja ugovora po javnom pozivu koji se odnosi na ovaj program.

i) Prednost prilikom odobrenja kreditnog zahtjeva imaju subjekti koji obezbjeđuju nova radna mjesta o čemu banka dostavlja podatke uz izvještaj nakon urađenog monitoringa.

j) Ova kreditna sredstva ne mogu se koristiti u svrhu otkupa kreditnih obaveza po ranije preuzetim kreditima kod drugih banaka.

k) Banka se obavezuje da će ugovorenu kreditnu liniju i rezultate koji se po istoj ostvaruju, bez naknade promovisati putem elektronskih i printanih medija tokom cijelog trajanja ugovora, te izvještavati Ministarstvo privrede Kantona Sarajevo o namjenskom trošenju kreditnih sredstava u formi koju ugovorom usaglase Ministarstvo privrede Kantona Sarajevo i Banka. U skladu sa ugovorom Banka vrši kontinuirani monitoring o namjenskom utrošku sredstava.

IV MJESTO I NAČIN PODNOŠENJA PONUDE

Ponudač/banka dostavlja ponudu u originalu u zatvorenoj koverti na protokol Kantona Sarajevo ili putem pošte. Na prednjoj strani koverta mora biti navedeno:

Naziv: Kanton Sarajevo - Ministarstvo privrede Kantona Sarajevo

Adresa: Ulica Reisa Džemaludina Čauševića broj 1, 71000 Sarajevo

Na koverti obavezno naglasiti: "Ponuda za pružanje bankarskih usluga - NE OTVARAJ"

Na poledini koverta obavezno se navodi: naziv podnosioca ponude, adresa i kontakt telefon, te se ovjerava pečatom. Ponuda se čvrsto uvezuje na način da se onemogućiti naknadno vađenje ili umetanje listova. Stranice ponude se označavaju brojem na način da je vidljiv redni broj stranice.

V ROK ZA PODNOŠENJE PONUDA NA JAVNI POZIV

Rok za dostavljanje ponuda je 30 (trideset) dana od dana objave Obavještenja o ovom Javnom pozivu u "Službenim novinama Kantona Sarajevo", odnosno od 15.06.2023. godine. Obavještenje o ovom javnom pozivu objavit će se u dnevnom listu "AVAZ". Potpuni tekst Javnog poziva se može preuzeti na službenoj web stranici Ministarstva privrede Kantona Sarajevo. Nakon isteka roka za dostavljanje ponuda po ovom javnom pozivu, Ministarstvo privrede Kantona Sarajevo će elektronskim putem (e-mail) obavijestiti sve podnosiocce ponude o datumu, vremenu i mjestu javnog otvaranja dostavljenih ponuda na ovaj javni poziv.

VI USLOVI ZA UČEŠĆE

Opća dokumentacija:

- a) Rješenje o registraciji banke kod nadležnog suda u Federaciji Bosne i Hercegovine i Aktuelni izvod iz sudskog registra nadležnog suda u Federaciji Bosne i Hercegovine za banku;
- b) Dokaz o dozvoli za rad (licenca) od Agencije za bankarstvo Federacije BiH;
- c) Certifikat za osiguranje depozita izdat od strane Agencije za osiguranje depozita BiH;
- d) Uvjerenje o poreznoj registraciji pravnog lica, izdato od Porezne uprave Federacije BiH;
- e) Uvjerenje o registraciji/upisu pravnog lica u Jedinostveni registar obveznika indirektnih poreza ili u slučaju da ponudač nije obveznik po ovom osnovu Uvjerenje da isti nije upisan u Jedinostveni registar obveznika indirektnih poreza, izdato od Uprave za indirektno-neizravno oporezivanje BiH;
- f) Izjava o adekvatnosti kapitala na dan 31.12.2022. godine koja ne smije biti manja od 15%;



- g) Uvjerenje o izmirenim porezima i doprinosima kojim se potvrđuje da se uredno izmiruju direktni porezi, doprinosi za PIO/MIO i zdravstveno osiguranje izdato od Porezne uprave Federacije BiH ne starije od tri mjeseca od dana podnošenja ponude;
- h) Uvjerenje nadležnog suda ili organa uprave kod kojeg je ponuđač registrovan kojim se potvrđuje da isti nije pod stečajem, niti je predmet stečajnog postupka, da nije predmet postupka likvidacije, odnosno da nije u postupku obustavljanja poslovne djelatnosti, u skladu sa važećim propisima u Bosni i Hercegovini;
- i) Finansijski izvještaji za 2022. godinu sa iskazanim potrebnim minimalnim iznosom dioničkog kapitala i dobiti nakon oporezivanja na dan 31.12.2022. godine koji uključuju sljedeće: bilans stanja, bilans uspjeha i izvještaj o promjenama u kapitalu;
- j) Izjava u originalu na memorandumu, ovjerena i potpisana od ovlaštene osobe o visini kapitala na dan 31.12.2022.godine, koji nije manji od 100 miliona KM;
- k) Izjava u originalu na memorandumu, ovjerena i potpisana od ovlaštene osobe ponuđača o tehničkoj opremljenosti i osposobljenosti za izvršenje traženih usluga (broj filijala/podružnica/ispostava banke u Kantonu Sarajevo); i
- l) Pojedinačne izjave predsjednika i članova uprave banke (ponuđača), u originalu na memorandumu banke, svojeručno potpisana, te nakon toga svaka pojedinačna izjava ovjerena od nadležnog organa (općina/notar), a kojom davalac izjave pod punom moralnom, materijalnom i krivičnom odgovornošću potvrđuje da se protiv njega ne vodi krivični postupak, kao i da nije pravosnažno osuđen za počinjenje krivičnog djela i/ili privredni prijestup.

Napomena: Sve fotokopije dokumenata moraju biti ovjerene od strane nadležnog tijela uprave ili notara, ovjerom koja nije starija više od 3 (tri) mjeseca, računajući od dana objave Javnog poziva.

VII OCJENA I IZBOR PONUDE

- a) Komisiju za izbor banke/banaka (u daljnjem tekstu: Komisija) rješenjem imenuje ministar Ministarstva privrede Kantona Sarajevo.
- b) Komisija, putem Ministarstva privrede Kantona Sarajevo, je dužna obavijestiti sve podnosiocce ponuda po ovom javnom pozivu, i to o datumu, vremenu i mjestu javnog otvaranja ponuda na ovaj javni poziv.
- c) Komisija za izbor banke ili banaka sačinjava preliminarni prijedlog izabrane banke/banaka za plasman poticajnih kreditnih sredstava, te isti objavljuje na web stranici Ministarstva i Oglasnoj ploči Kantona Sarajevo.
- d) Podnosilac ponude, u cilju zaštite svojih prava, može dostaviti pisani prigovor Ministarstvu privrede Kantona Sarajevo, u roku od osam dana od dana objave preliminarnog prijedloga.
- e) Odmah nakon rješavanja prigovora, Komisija sačinjava prijedlog izabrane banke/banaka za plasman poticajnih kreditnih sredstava.
- f) Na osnovu prijedloga Komisije, Ministarstvo privrede Kantona Sarajevo utvrđuje prijedlog odluke o izboru banke/ banaka, a odluku na prijedlog ovog Ministarstva donosi Vlada Kantona Sarajevo.
- g) U slučaju da se u postupku izbora banaka ne izabere niti jedna banka ili se izabere jedna banka, može se objaviti novi (drugi) javni poziv za izbor banke/banaka za preostala odnosna poticajna sredstva.

Kriteriji za ocjenu ponude:

- a) - iznos kreditnih sredstava/ 1 milion sredstava za subvenciju-----max.10 bodova.



- b) - visina kamatne stope ----- max. 70 bodova
c) - visina troškova obrade kredita -----max. 10 bodova.
d) - grace period (iskazan u mjesecima) = 6 mjeseci ----- 2 boda.
- grace period (iskazan u mjesecima) > 6 mjeseci -----max. 8 bodova.

Po ovom javnom pozivu nije dopušteno dostavljanje alternativnih ponuda po bilo kojem od navedenih kriterija. U slučaju da više banaka, nakon ocjenjivanja ponuda, ostvare isti broj bodova, prednost u izboru ekonomski najpovoljnije ponude imat će ponuda banke čija je veća visina kapitala na dan 31.12.2022. godine. Ugovor se zaključuje sa bankom/bankama (do dvije banke) koje su u skladu sa navedenim uslovima i kriterijima dostavile ekonomski najpovoljniju ponudu. Sve banke, učesnice na javnom pozivu će biti obaviještene o odluci i rezultatu postupka izbora banke, u roku od sedam dana od donošenja predmetne odluke.

IX OSTALE ODREDBE

U postupku po ovom Javnom pozivu Ministarstvo privrede Kantona Sarajevo ne snosi nikakve troškove učesnika Javnog poziva, te zadržava pravo da poništi Javni poziv, ili da odbaci sve ponude, u bilo koje vrijeme prije zaključenja ugovora. Prispjela dokumentacija se ne vraća podnosiocu ponude. Sve dodatne informacije vezane za Javni poziv mogu se dobiti svakim radnim danom od 13.00 - 14.00 sati putem telefona: 033/ 562 158.



Dostaviti:

1. Evidencija
2. a/a